

Allannguutissatut siunnersuut

uunga

UPA 2015/148: Siunnersuut uunga: Inatsisartut Suleriaasiata allanngortinneqarnera.

Aappassaaneerinninnissamut Inatsisinut Ataatsimiititaliami amerlanerussuteqartunit Siumup Demokraatillu sinniisaannit saqqummiunneqartoq.

Allannguutissatut siunnersuutip saqqummiunneqarnissaanut piumasaqaataavoq siunnersuutip, Inatsisinut Ataatsimiititaliami ikinnerussuteqartunit saqqummiunneqartup, itigartinneqarnissaa.

§ 1-imut

1. § 1, nr. 3-p kingornanut ilanngunneqassaaq.

”01. § 9-mi *imm.* 1-ip kingornanut immikkoortut nutaatut ilanngunneqassaaq:

”*Imm.* 2. Partiit tamarmik Aningaasaqarnermut Ataatsimiititaliami sinniisuutitaqanngitsut ataatsimeeqataasartumik ataatsimik, amerlanerpaamilli katillugit marlunnik, toqqaasinnaapput. Partiit Aningaasaqarnermut Ataatsimiititaliami sinniisuutitaqanngitsut marlunni amerlaneruppata, qassinik ilaasortaqaarneq tunngavigalugu aalajangerneqartassaaq, partiinit taakkunannga sorliit ataatsimeeqataasartunik toqqaasinnaatitaanersut, ataatsimiititaliani inissat agguataarneqarneranni periususartooq assigalugu. Ataatsimeeqataasartut oqaaseqarsinnaatitaapput taasisinnaatitaanatilli, taamatullu aamma ataatsimiititaliap isumaliutissiissutaani, ilassutitut aningaasaliissutit pillugit aalajangiinerini allakkiaaniluunniit il.il. oqaaseqaatinik ilanngussisinnaanatik.”

Imm. 2-3 tamatuma kingorna *imm.* 3-4-nngorput.”

Allannguutissatut siunnersuummut nassuiaatit

Nalinginnaasumik nassuiaatit

Inatsisissatut siunnersuutaqqaartumut sanilliullugu allannguutissatut siunnersuutip malitsigissavaa Aningaasaqarnermut Ataatsimiititaliamut ilaasortat tallimat ataatsimeeqataasartunik marluk tikillugit ilassuserneqarsinnaalissammata, partiit tamarmik ataatsimiititaliami sinniisuutitaqanngippata. Taamaalilluni partii ataatsimiititaliami sinniisuutitaqanngitsoq periarfissaqalissaaq ataatsimeeqataasartussamik toqqaanissaminut. Ataatsimeeqataasartulli amerlanerpaamik marluk toqqaarneqarsinnaapput. Partiit marlunnik amerlanerusut ataatsimiititaliami sinniisuutitaqanngippata D'hondtip periaasia malillugu aalajangerneqartariaqassaaq partiit ataatsimiititaliami sinniisuutitaqanngitsut sorliit ataatsimeeqataasartussanik toqqaasinnaatitaassanersut.

Allannguutissatut siunnersuummut tunuliaqutaasut sukumiinerusumik allaaserineqarnera eqqarsaatigalugu Inatsisinut Ataatsimiititaliap isumaliutissiissutaa innersuussutigineqarpoq.

Aalajangersakkanut ataasiakkaanut nassuiaatit

Nr. 1-imut.

Partiit tamarmik Aningaasaqarnermut Ataatsimiititaliami sinniisuutitaqanngitsut ataatsimeeqataasartumik ataatsimik, amerlanerpaamilli katillugit marlunnik, toqqaasinnaanerat aalajangersakkami aalajangersarneqarpoq.

Partiit marlunnit amerlanerusut ataatsimiititaliami sinniisuutitaqanngippata D'hondtip periaasia malillugu aalajangerneqartariaqassaaq partiit ataatsimiititaliami sinniisuutitaqanngitsut sorliit ataatsimeeqataasartussanik toqqaasinnaatitaassanersut. Ataatsimeeqataasartussanik qinersinermi qinersisarnerit pillugit teknikikkut suleqatigiittoqarsinnaavoq. Taamaallaalli partiit ataatsimiititaliami sinniisuutitaqanngitsut kisimik taamatut suleqatigiissinnaapput.

Ataatsimeeqataasartut ataatsimiititaliap ataatsimiinnerini ingerlassinnaasaanilu allani, soorlu ataatsimiititaliap angalanerini, peqataasassapput. Oqaaseqarsinnaatitaassapput, kisiannili ataatsimiititaliap isumaliutissiissutaani, ilassutitut aningaasaliissutit pillugit aalajangiinerini allakkiaaniluunniit allani, tassunga ilanngullugit ass. tusagassiorfinnut nalunaarutini, oqaaseqaatinik ilanngussinnaanatik.